

Biddizzi, umanità, amuri

Tri su li culura di la nostra bannèra
viridi-biddizzi,
biancu-umanità,
russu-amuri.

Virdi:
è la spiranza di lu nostru caminu
ca fussi pi tutti ginirusu;
li biddizzi di la nostra sicilia,
ricca di sciuri di zaraga profumata;
li biddizzi di lu celu lucenti,
di lu caluri di lu sulì,
li biddizzi di l'occhi viridi
di li fimmini siciliani.

Biancu:
è l'umanità di natri siciliani
c'avemu versu l'atri populi,
biancu argentu è lu culuri di la luna
ca fa a tutti, nichi e granni, 'namurari;
biancu è lu simbulu di paci
nni lu munnu,
biancu è lu cori di un picciliddu,
biancu è lu sciuri di un gigliu.

Russu:
è l'amuri c'avemu
versu li nostri figli,
versu la fidi,
versu lu Signuri;
russu è l'ardiri c'avemu
versu la nostra amata;
russu comu lu focu ca ardi
d'amuri versu la vita.

Tri su li culura di la nostra bannèra,
ma chiossà su li
biddizzi, l'umanità
e l'amuri di natri siciliani.